

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA

Broj: 02-02-7-425/16  
Sarajevo, 3. 3. 2016. godine

**Z A P I S N I K**  
**DEVETE SJEDNICE DOMA NARODA PARLAMENTA FEDERACIJE**  
**BOSNE I HERCEGOVINE, održane 3. marta 2016. godine**

Sjednica je počela u 12 sati i 30 minuta.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Predsjedavajuća je pozdravila prisutne, napomenula da je izostanak sa sjednice opravdao Slaviša Mihajlović i, na osnovu evidencije Stručne službe, konstatovala da sjednici prisustvuje 45 delegata što čini većinu, te Dom naroda može raditi i punovažno odlučivati.

Predsjedavajuća je dala na glasanje Zapisnik Pete sjednice Doma naroda Parlamenta Federacije Bosne i Hercegovine, održane 19. decembra 2015. godine i 11. januara 2016. godine.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, bez primjedbi, sa 48 glasova za, usvojio Zapisnik Pete sjednice Doma naroda Parlamenta Federacije Bosne i Hercegovine, održane 19. decembra 2015. godine i 11. januara 2016. godine.

Poslije glasanja, predsjedavajuća je zamolila sekretara Doma naroda da pojedinačnom prozivkom utvrdi kvorum i, nakon prozivke, konstatovala da sjednici prisustvuje 52 delegata.

Predsjedavajuća je dala na glasanje Zapisnik Osme sjednice Doma naroda Parlamenta Federacije Bosne i Hercegovine, održane 11. januara 2016. godine.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, bez primjedbi, sa 50 glasova za, usvojio Zapisnik Osme sjednice Doma naroda Parlamenta Federacije Bosne i Hercegovine, održane 11. januara 2016. godine.

Predsjedavajuća Doma naroda, na osnovu člana 104. Poslovnika o radu Doma naroda Parlamenta Federacije Bosne i Hercegovine, pozvala je delegate da, ukoliko žele, postave delegatska pitanja i pokrenu inicijative.

## **Delegatska pitanja i inicijative**

**Lejla Imamović** pokrenula je inicijativu u ime Kluba delegata bošnjačkog naroda. Zatražila je da Federalno ministarstvo okoliša i turizma i Federalna uprava za inspekcijske poslove, u što kraćem roku, Domu narodu Parlamenta Federacije Bosne i Hercegovine dostave informaciju o statusu okolinskih dozvola za Arcelormital Zenica i Prevent Visoko, kao i realizaciju projekata koji su tim dozvolama planirani.

**Drago Puzigaća** izrazio je nezadovoljstvo zbog izostanka odgovora na ranije postavljena pitanja.

Postavio je pitanje Vladi, odnosno premijeru, koje glasi: „Kada ćete gospodine premijeru doći u radnu posjetu opštinama Drvar, Bosansko Grahovo i Glamoč sa resornim ministrima za raseljena i izbjegla lica, te ministrima za energetiku i telekomunikacije u cilju pomoći ovim opštinama koje se nalaze u bezizlaznoj finansijskoj ekonomskoj, privrednoj i svim drugim sferama?“

**Segmedina Srna Bajramović** postavila je dva pitanja.

Prvo pitanje upućeno je Vladi, a tiče se moratorija na zapošljavanje koji traje do 31. marta 2016. godine. Zatražila je da, ukoliko su ove informacije tačne, dobije informacije o svim prijemima po ugovoru o djelu sa pojedinačnim obrazloženjima neodložne potrebe za ovim ugovorima.

Drugo pitanje uputila je Ministarstvu rada i socijalne politike, a odnosi se na navodnu izmjenu člana 11. Pravilnika o podnošenju prijave za upis i promjene upisa i jedinstvenom sistemu registracije, kontrole i naplate doprinosa. Nakon sticanja prava na penziju građani podnose prijavu Federalnom zavodu za penzijsko i invalidsko osiguranje da bi dobili rješenje kojim im se dodjeljuje status penzionera. Nažalost, na to rješenje se čeka nekoliko mjeseci, a dotad građani nemaju zdravstveno osiguranje, ne mogu se liječiti. Upitala je da li su ove informacije tačne i, ukoliko jesu, zatražila da se u najkraćem roku pripreme sve neophodne izmjene da bi ovaj problem bio riješen.

**Mladen Lonić** zatražio je od Stručne službe Doma naroda da mu dostavi transkript sjednice na kojoj je donesen Zakon o izmjenama i dopunama Zakona o državnoj službi u Federaciji Bosne i Hercegovine. Također, zatražio je i izvještaje radnih tijela vezane za održavanje ove sjednice.

**Almedin Aliefendić** postavio je dva delegatska pitanja.

Prvo pitanje je o Zakonu o sukobu interesa. Upitao je kada će Vlada Federacije BiH, odnosno Federalno ministarstvo pravde, dostaviti Zakon o sukobu interesa u parlamentarnu proceduru, s obzirom da je provedena procedura kroz Nacrt zakona.

Drugo pitanje postavio je Elektroprivredi BiH i Rudniku mrkog uglja Kakanj, a pitanje glasi: „Na koji način će biti provedena procedura zapošljavanja?“

Hoće li biti javnog oglašavanja čime bi se osigurao pošten i pravedan tretman za sve zainteresovane kandidate ili će diskreciono pravo direktora biti u postupku odlučivanja?“

Također, napomenuo je da još nije dobio odgovor na tri pitanja koja je, na prethodnoj sjednici, postavio Javnom preduzeću Elektroprivreda BiH.

**Aner Žuljević** izrazio je negodovanje zbog kašnjenja početka sjednice. Postavio je jedno delegatsko pitanje i pokrenuo inicijativu.

Inicijativom je zatraženo da Klub delegata hrvatskog naroda i Dom naroda Parlamenta Federacije Bosne i Hercegovine, osude izjavu gospodina Maria Karamatića, delegata u Domu naroda Parlamentarne skupštine Bosne i Hercegovine. Karamatić je, naveo je Žuljević, u javnom istupu na Televiziji Pink, priznao da ne plaća RTV taksu te pozvao gledatelje da redovno plaćaju doprinose kako bi on imao redovna primanja. Žuljević je zatražio da, zbog ove izjave, Mario Karamatić podnese ostavku.

Pitanje je postavio Federalnom ministarstvu okoliša i turizma od kojeg je zatražio da mu dostavi Zapisnik sa javne rasprave održane 9. 7. 2015. godine, o studiji koja se tiče uticaja na okoliš mikro ili malih hidroelektrana Buna 1 i Buna 2. Zatražio je i da mu, ukoliko je izdata okolišna dozvola, bude dostavljena i studija o uticaju na okoliš na osnovu koje je takva dozvola izdata.

**Anes Osmanović** postavio je jedno delegatsko pitanje i pokrenuo jednu inicijativu.

Pitanje je uputio Vladi Federacije BiH. Zanima ga koji je razlog za isključivanje ugostiteljstva iz davanja poticaja.

Pokrenuo je inicijativu da Vlada Federacije BiH razmotri stanje u ugostiteljstvu i preduzme određene mjere da bi se ovoj grani i ljudima koji se bave ugostiteljstvom, pomoglo.

**Fuad Hadžimehmedović** postavio je pitanje Vladi Federacije BiH, a tiče se Zakona o raspodjeli javnih prihoda. Zanima ga zašto ovaj zakon još nije stigao u parlamentarnu proceduru, zašto se zaustavljaju inicijative za njegovu izmjenu i zašto se ne poštuje Zaključak Doma naroda po ovom pitanju.

**Osman Ćatić**, u ime Kluba delegata bošnjačkog naroda, pokrenuo je dvije inicijative. Prvom inicijativom predlaže Kolegiju Doma naroda Parlamenta FBiH da, u što kraćem roku, sazove tematsku sjednicu o stanju u zdravstvenom sektoru Federacije sa prijedlogom mjera. Klub delegata bošnjačkog naroda predlaže da Vlada Federacije dostavi informaciju o stanju u zdravstvenom sektoru u FBiH sa prijedlogom mjera na osnovu koje bi Dom donio zaključke za poboljšanje stanja u sektoru zdravstva. Također, od Vlade traži da u parlamentarnu proceduru dostavi akte potrebne za poboljšanje stanja u zdravstvenom sektoru.

Druga inicijativa - Klub delegata bošnjačkog naroda u Domu naroda Parlamenta FBiH predlaže Vladi Federacije BiH da u parlamentarnu proceduru dostavi zakon o javnom redu u FBiH. Klub delegata bošnjačkog naroda predlaže Vladi Federacije BiH da uputi u parlamentarnu proceduru nacrt zakona o javnom redu u FBiH, a koji bi se odnosio na organizovanje sportskih i drugih manifestacija na području FBiH, kao i druga javna okupljanja odnosno druga pitanja iz oblasti javnog reda na području FBiH. Molim Vladu FBiH da, u saradnji sa kantonima, do kraja ove godine pripremi tekstove propisa iz oblasti javnog reda za čije donošenje postoji potreba na nivou FBiH.

**Ismet Sarajlić** postavio je pitanje Vladi Federacije BiH u vezi Reformske agende i zanima ga da li u planu Reformske agende i određenih izmjena Zakona, postoji inicijativa za ukidanje takozvanog „diskrecionog prava direktora“.

**Amil Buljubašić** postavio je dva delegatska pitanja.

Prvo pitanje vezano je za objavljivanje presude Ustavnog suda Federacije BiH, a ono glasi: „Kada se očekuje objava presuda Ustavnog suda u Službenim novinama koje se odnose na Zakon o radu i Uredbu o vršenju ovlaštenja u privrednim društvima?“

Drugo pitanje upućeno je Federalnoj direkciji za ceste. Zanima ga da li je načelnik Općine Tešanj inicirao rješavanje problema na području općine Tešanj, odnosno izgradnju trotoara uz magistralnu cestu M4, M17, ukoliko prolaze kroz općinu Tešanj, a posebno kroz mjesnu zajednicu Kreševo.

**Vesna Saradžić** izrazila je negodovanje zbog nedobijanja odgovora niti na jedno upućeno pitanje i inicijativu. Naglasila je da je uputila Inicijativu rukovodstvu Doma za stavljanje na dnevni red Prijedloga zakona o liječenju neplodnosti medicinski potpomognutom oplodnjom te da je zanima odgovor koji još čeka.

Nakon delegatskih pitanja i inicijativa delegati su utvrdili dnevni red.

Predsjedavajuća je obavijestila delegate da je Vlada Federacije dostavila Prijedlog Zakona o izmjenama i dopunama Krivičnog zakona FBiH, Prijedlog zakona o izmjenama i dopunama zakona o jedinstvenom sistemu kontrole i naplate doprinosa i Prijedlog Zakona o državljanstvu FBiH sa prijedlogom da se razmatraju po hitnom postupku.

Jasenko Tufekčić, predsjednik Zakonodavno-pravne komisije, predložio je, u ime Komisije, da se ovi zakoni razmatraju u formi nacrta.

Na osnovu rezultata glasanja, predsjedavajuća je konstatovala da Dom naroda Parlamenta Federacije Bosne i Hercegovine:

- sa 22 glasa protiv, 27 uzdržanih i jednim glasom za, **nije prihvatio** prijedlog da Prijedlog zakona o izmjenama i dopunama Krivičnog

zakona Federacije BiH bude razmatran po hitnom postupku, te će ovaj zakon biti razmatran u formi Nacrta;

- sa 26 glasova protiv, 24 uzdržana glasa, **nije prihvatio** prijedlog da Prijedlog zakona o izmjenama i dopunama zakona o jedinstvenom sistemu kontrole i naplate doprinosa bude razmatran po hitnom postupku, te će ovaj zakon biti razmatran u formi Nacrta;
- sa 34 glasa protiv, 16 uzdržanih glasova i dva glasa za, **nije prihvatio** da Prijedlog Zakona o državljanstvu FBiH bude razmatran po hitnom postupku, te će ovaj zakon biti razmatran u formi Nacrta.

Budući da nije bilo prijedloga za izmjenu i dopunu predloženog dnevnog reda, predsjedavajuća je konstatovala da je Dom naroda Parlamenta Federacije Bosne i Hercegovine, sa 43 glasa za, usvojio sljedeći

### DNEVNI RED

1. Prijedlog zakona o izmjenama i dopunama Zakona o posredovanju u privatnom osiguranju,
2. Prijedlog zakona o trezoru u Federaciji Bosne i Hercegovine,
3. Nacrt zakona o izmjenama i dopunama Krivičnog zakona Federacije Bosne i Hercegovine,
4. Nacrt zakona o izmjenama i dopunama Zakona o jedinstvenom sistemu registracije, kontrole i naplate doprinosa,
5. Nacrt zakona o državljanstvu Federacije Bosne i Hercegovine,
6. Nacrt zakona o izmjenama i dopunama Zakona o arhivskoj građi Federacije Bosne i Hercegovine,
7. Nacrt zakona o izmjenama i dopunama Zakona o slobodi pristupa informacijama u Federaciji Bosne i Hercegovine,
8. Nacrt zakona o izmjenama i dopunama Zakona o leasingu,
9. Nacrt zakona o povjeravanju javnih ovlasti auto-moto klubovima u Federaciji Bosne i Hercegovine,
10. Nacrt zakona o dopuni Zakona o utvrđivanju naseljenih mjesta i o izmjenama u nazivima naseljenih mjesta u određenim općinama,
11. Nacrt zakona o hemikalijama,

12. Prijedlog odluke o davanju saglasnosti na Finansijski plan Zavoda za transfuzijsku medicinu Federacije Bosne i Hercegovine za 2016. godinu  
Finansijski plan Zavoda za transfuzijsku medicinu FBiH za 2016. godinu,
13. Prijedlog finansijskog plana-Budžeta FERK-a za 2016. godinu,
14. Program rada Vlade Federacije Bosne i Hercegovine za 2016. godinu,
15. Izvještaji o zaduženju Federacije Bosne i Hercegovine po osnovu emisije trezorskih zapisa na dan: 15.9.2015. godine, 22.9.2015. godine, 13.10.2015. godine, 10.11.2015. godine i 15.12. 2015. godine,
16. Izvještaji o zaduženju Federacije Bosne i Hercegovine po osnovu emisije obveznica na dan: 20.10.2015. godine, 26.11. 2015. godine, 8.12. 2015. godine i 17.12. 2015. godine.
17. Prijedlog za rješenje spornih pitanja u Prijedlogu Zakona o izmjeni i dopuni Zakona o eksproprijaciji.

### **1. Prijedlog zakona o izmjenama i dopunama Zakona o posredovanju u privatnom osiguranju**

Prijedlog zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na Sedmoj sjednici, održanoj 3. februara 2016. godine, usvojio Prijedlog zakona o izmjenama i dopunama Zakona o posredovanju u privatnom osiguranju u tekstu kako ga je predložila Vlada Federacije.

Prijedlog zakona razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 33 glasa za, dva

uzdržana i jednim protiv, usvojio Prijedlog zakona o izmjenama i dopunama Zakona o posredovanju u privatnom osiguranju.

## **2. Prijedlog zakona o trezoru u Federaciji Bosne i Hercegovine**

Prijedlog zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na Osmoj sjednici, održanoj 23. februara 2016. godine, usvojio Prijedlog zakona o trezoru u Federaciji Bosne i Hercegovine u tekstu kako ga je predložila Vlada Federacije.

Prijedlog zakona razmatrala su nadležna radna tijela i dostavila svoje izvještaje.

U raspravi su učestvovali: Slaviša Šućur, Vesna Saradžić, Mustafa Kurtović i Osman Čatić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 30 glasova za, tri uzdržana i osam protiv, usvojio Prijedlog zakona o trezoru u Federaciji Bosne i Hercegovine.

## **3. Nacrt zakona o izmjenama i dopunama Krivičnog zakona Federacije Bosne i Hercegovine**

Zakon je utvrdila Vlada Federacije.

Predstavnički dom Parlamenta Federacije obavijestio je Dom naroda da je na Osmoj sjednici, održanoj 23. februara 2016. godine, usvojio Prijedlog zakona o izmjenama i dopunama Krivičnog zakona Federacije Bosne i Hercegovine, uz tehničku ispravku koju je dao ministar pravde, a koji se odnosi na član 11. stav 4. novog člana 210a. u kome se riječi: „stav 1. i 3.“ zamjenjuju riječima: „stav 1. i 2. i stav 7. u kome se tekst „stav 1. i 3.“ zamjenjuju tekstem: „stav 1. i 2.“.

Zakon su, u formi Prijedloga, razmatrala nadležna radna tijela i dostavila svoje izvještaje.

U raspravi su učestvovali: Aner Žuljević, Admir Hadžipašić i Vesna Saradžić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 34 glasa za, dva glasa protiv i jednim uzdržanim glasom usvojio sljedeći

## ZAKLJUČAK

1. Dom naroda prihvaća Nacrt zakona o izmjenama i dopunama Krivičnog zakona Federacije Bosne i Hercegovine i smatra da može poslužiti kao osnova za izradu Prijedloga zakona.
2. Zadužuje se Vlada Federacije Bosne i Hercegovine da, prilikom izrade Prijedloga zakona, ima u vidu sugestije, primjedbe i prijedloge iznesene na sjednici Doma naroda.

### **4. Nacrt zakona o izmjenama i dopunama Zakona o jedinstvenom sistemu registracije, kontrole i naplate doprinosa**

Zakon je utvrdila Vlada Federacije.

Predstavnički dom Parlamenta Federacije obavijestio je Dom naroda da je na Osmoj sjednici, održanoj 23. februara 2016. godine, usvojio Prijedlog zakona o izmjenama i dopunama Zakona o jedinstvenom sistemu registracije, kontrole i naplate doprinosa sa sljedećim sugestijama pravno-tehničke prirode koje je dala Zakonodavno-pravna komisija, a koje je predstavnik predlagača prihvatio - da se u nazivu Prijedloga zakona naznači da se radi samo o izmjenama Zakona.

Da se u članu 4. Prijedloga zakona u prvom redu riječ: „osmog“ zamijeni riječju „narednog“ jer se radi o Prijedlogu zakona koji se predlaže i razmatra po hitnoj proceduri.

Zakon su, u formi Prijedloga, razmatrala nadležna radna tijela i dostavila svoje izvještaje.

U raspravi je učestvovala Draženka Subašić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 37 glasova za, bez glasova protiv i dva uzdržana glasa, usvojio sljedeći

## ZAKLJUČAK

1. Dom naroda prihvaća Nacrt zakona o izmjenama i dopunama Zakona o jedinstvenom sistemu registracije, kontrole i naplate doprinosa i smatra da može poslužiti kao osnova za izradu Prijedloga zakona.
2. Zadužuje se Vlada Federacije Bosne i Hercegovine da, prilikom izrade Prijedloga zakona, ima u vidu sugestije, primjedbe i prijedloge iznesene na sjednici Doma naroda.



## **5. Nacrt zakona o državljanstvu Federacije Bosne i Hercegovine**

Zakon je utvrdila Vlada Federacije.

Predstavnički dom Parlamenta Federacije obavijestio je Dom naroda da je na Osmoj sjednici, održanoj 27. oktobra 2015. godine, usvojio Prijedlog zakona o državljanstvu Federacije Bosne i Hercegovine u tekstu kako ga je predložila Vlada Federacije. Tom prilikom, Predstavnički dom usvojio je inicijativu koja glasi: „Upućuje se inicijativa Ministarstvu civilnih poslova Bosne i Hercegovine da preispita odredbe važećeg uputstva o naknadnom upisu u matičnu knjigu rođenih koji su stekli državljanstvo Republike Bosne i Hercegovine u skladu sa Zakonom o državljanstvu Republike BiH.“

Na Zakon, u formi Prijedloga, pet amandmana podnio je Admir Hadžipašić. Amandmani se smatraju primjedbama, prijedlozima i sugestijama na Nacrt zakona.

Zakon su, u formi Prijedloga, razmatrala nadležna radna tijela i dostavila svoje izvještaje.

U raspravi su učestvovali: Vesna Saradžić i Admir Hadžipašić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 38 glasova za, bez glasova protiv i dva uzdržana glasa, usvojio sljedeći

### **ZAKLJUČAK**

1. Dom naroda prihvata Nacrt zakona o državljanstvu Federacije Bosne i Hercegovine i smatra da može poslužiti kao osnova za izradu Prijedloga zakona.
2. Zadužuje se Vlada Federacije Bosne i Hercegovine da, prilikom izrade Prijedloga zakona, ima u vidu sugestije, primjedbe i prijedloge iznesene na sjednici Doma naroda.

Dom naroda usvojio je i sljedeću

### **INICIJATIVU**

Upućuje se Inicijativa Ministarstvu civilnih poslova Bosne i Hercegovine da preispita odredbe vrijedećeg Uputstva o naknadnom upisu u matičnu knjigu rođenih koji su stekli državljanstvo Republike Bosne i Hercegovine u skladu sa Zakonom o državljanstvu Republike Bosne i Hercegovine, Instrukcije Ministarstva civilnih poslova Bosne i Hercegovine o naknadnom upisu činjenice državljanstva u matičnu knjigu rođenih iz 2004.

godine i eventualno mogućnost preispitivanja dodatnih kriterija za prijem u državljanstvo osoba koje su rođene prije 1. januara 1998. godine.

Sastavni dio ove Inicijative su Amandmani na Prijedlog zakona o državljanstvu Federacije Bosne i Hercegovine koje je podnio Admir Hadžipašić, delegat u Domu naroda Parlamenta Federacije Bosne i Hercegovine.

## **6. Nacrt zakona o izmjenama i dopunama Zakona o arhivskoj građi Federacije Bosne i Hercegovine**

Nacrt zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na Sedmoj sjednici, održanoj 3. februara 2016. godine, razmatrao Nacrt zakona o izmjenama i dopunama Zakona o arhivskoj građi Federacije Bosne i Hercegovine i Zaključkom ga prihvatio.

Nacrt zakona razmatrala su nadležna radna tijela i dostavila svoje izvještaje.

U raspravi je učestvovao Slaviša Šućur.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 35 glasova za, bez glasova protiv i jednim uzdržanim glasom, usvojio sljedeći

### **ZAKLJUČAK**

1. Dom naroda prihvća Nacrt zakona o izmjenama i dopunama Zakona o arhivskoj građi Federacije Bosne i Hercegovine i smatra da može poslužiti kao osnova za izradu Prijedloga zakona.
2. Zadužuje se Vlada Federacije Bosne i Hercegovine da, prilikom izrade Prijedloga zakona, ima u vidu sugestije, primjedbe i prijedloge iznesene na sjednici Doma naroda.

## **7. Nacrt zakona o izmjenama i dopunama Zakona o slobodi pristupa informacijama u Federaciji Bosne i Hercegovine**

Nacrt zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je u nastavku Sedme sjednice, održanom 3. februara 2016. godine, prihvatio Nacrt zakona o izmjenama i dopunama Zakona o slobodi pristupa informacijama u FBiH.

Nacrt zakona razmatrala su nadležna radna tijela i dostavila svoje izvještaje.

U raspravi je učestvovao Edim Fejzić, predsjednik Komisije za ljudska prava i slobode Doma naroda.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 38 glasova za, jednim uzdržanim glasom i bez glasova protiv, usvojio sljedeći

### **ZAKLJUČAK**

Dom naroda prihvaća Nacrt zakona o izmjenama i dopunama Zakona o slobodi pristupa informacijama u Federaciji Bosne i Hercegovine i smatra da može poslužiti kao osnova za izradu Prijedloga zakona.

#### **8. Nacrt zakona o izmjenama i dopunama Zakona o leasing-u**

Nacrt zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je u nastavku Osme sjednice, održanom 23. februara 2016. godine, razmatrao Nacrt zakona o izmjenama i dopunama Zakona o leasing-u i Zaključkom ga prihvatio. Tom prilikom ovaj zakon stavljen je na javnu raspravu.

Nacrt zakona razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 36 glasova za, bez uzdržanih glasova i jednim glasom protiv, usvojio sljedeći :

### **ZAKLJUČAK**

1. Dom naroda prihvaća Nacrt zakona o izmjenama i dopunama Zakona o leasingu i smatra da može poslužiti kao osnova za izradu Prijedloga zakona.

2. Zadužuje se predlagač da organizuje i provede javnu raspravu u trajanju od 90 dana.
3. Zadužuje se Vlada Federacije da, prilikom izrade Prijedloga zakona ima u vidu sve primjedbe, prijedloge i sugestije iznesene u javnoj raspravi.

### **9. Nacrt zakona o povjeravanju javnih ovlasti auto-moto klubovima u Federaciji Bosne i Hercegovine**

Nacrt zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na Sedmoj sjednici, održanoj 3. februara 2016. godine, razmatrao Nacrt zakona o povjeravanju javnih ovlasti auto-moto klubovima u FBiH i Zaključkom ga prihvatio. Tom prilikom, ovaj zakon stavljen je na javnu raspravu.

Nacrt zakona razmatrala su nadležna radna tijela i dostavila svoje izvještaje.

U raspravi je učestvovao Predrag Kojović.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 31 glasom za, jednim uzdržanim i pet glasova protiv, usvojio sljedeći

### **ZAKLJUČAK**

1. Dom naroda prihvaća Nacrt zakona o povjeravanju javnih ovlasti auto-moto klubovima u Federaciji Bosne i Hercegovine i smatra da može poslužiti kao osnova za izradu Prijedloga zakona.
2. Zadužuje se Vlada Federacije Bosne i Hercegovine da organizuje i provede javnu raspravu u trajanju od 30 dana.
3. Zadužuje se Vlada Federacije Bosne i Hercegovine da, prilikom izrade Prijedloga zakona, ima u vidu sugestije, primjedbe i prijedloge iznesene na sjednici Doma naroda i u javnoj raspravi.

### **10. Nacrt zakona o dopuni Zakona o utvrđivanju naseljenih mjesta i o izmjenama u nazivima naseljenih mjesta u određenim općinama**

Nacrt zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na Sedmoj sjednici, održanoj 3. februara 2016. godine, razmatrao Nacrt zakona o dopuni zakona o utvrđivanju naseljenih mjesta i o izmjenama u nazivima naseljenih mjesta u određenim općinama i Zaključkom ga prihvatio. Tom prilikom, ovaj zakon stavljen je na javnu raspravu.

Nacrt zakona razmatrala su nadležna radna tijela i dostavila svoje izvještaje.

U raspravi je učestvovao Slaviša Šućur.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 40 glasova za i jednim uzdržanim glasom, usvojio sljedeći

## **ZAKLJUČAK**

1. Dom naroda prihvata Nacrt zakona o dopuni Zakona o utvrđivanju naseljenih mjesta i o izmjenama u nazivima naseljenih mjesta u određenim općinama i smatra da može poslužiti kao osnova za izradu Prijedloga zakona.
2. Zadužuje se Vlada Federacije Bosne i Hercegovine da, prilikom izrade Prijedloga zakona, ima u vidu sugestije, primjedbe i prijedloge iznesene na sjednici Doma naroda.

### **11. Nacrt zakona o hemikalijama**

Nacrt zakona utvrdila je Vlada Federacije.

Predstavnički dom Parlamenta Federacije obavijestio je Dom naroda da je na Sedmoj sjednici, održanoj 3. februara 2016. godine, razmatrao Nacrt zakona o hemikalijama i Zaključkom ga prihvatio. Tom prilikom, ovaj zakon stavljen je na javnu raspravu.

Nacrt zakona razmatrala su nadležna radna tijela i dostavila svoje izvještaje.

U raspravi je učestvovao Saviša Šućur.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 38 glasova za, uz dva uzdržana glasa, usvojio sljedeći

## ZAKLJUČAK

1. Dom naroda prihvaća Nacrt zakona o hemikalijama i smatra da može poslužiti kao osnova za izradu prijedloga zakona.
2. Zadužuje se Vlada Federacije Bosne i Hercegovine da, prilikom izrade prijedloga zakona, ima u vidu sugestije, primjedbe i prijedloge iznesene na sjednici Doma naroda.

### **12. Prijedlog odluke o davanju saglasnosti na Finansijski plan Zavoda za transfuzijsku medicinu Federacije Bosne i Hercegovine za 2016. godinu Finansijski plan Zavoda za transfuzijsku medicinu FBiH za 2016. godinu**

Prijedlog odluke dostavila je Vlada Federacije radi razmatranja i donošenja.

Prijedlog odluke razmatrala su nadležna radna tijela i dostavila svoje izvještaje.

U raspravi su učestvovali: Predrag Kojović, Jasenko Tufekčić i Željko Mirković.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 28 glasova za, uz 13 uzdržanih glasova, donio Odluku o davanju saglasnosti na Finansijski plan za transfuzijsku medicinu Federacije BiH za 2016. godinu.

### **13. Prijedlog finansijskog plana-Budžeta FERK-a za 2016. godinu**

Prijedlog finansijskog plana-Budžeta FERK-a dostavila je Regulatorna komisija za energiju Federacije BiH.

Predstavnički dom Parlamenta Federacije obavijestio je Dom naroda da je na Šestoj sjednici, održanoj 22. decembra 2015. godine, usvojio Prijedlog finansijskog plana-Budžeta FERK-a za 2016. godinu.

Prijedlog su razmatrala nadležna radna tijela i dostavila svoje izvještaje.

U raspravi su učestvovali: Slaviša Šućur i Osman Ćatić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 36 glasova za i pet uzdržanih glasova, usvojio usvojio Prijedlog finansijskog plana-Budžeta FERK-a za 2016. godinu.

#### **14. Program rada Vlade Federacije BiH za 2016. godinu**

Program rada dostavila je Vlada Federacije radi razmatranja.

Predstavnički dom Parlamenta Federacije obavijestio je Dom naroda da je na Osmoj sjednici, održanoj 23. februara 2016. godine, usvojio Program rada Vlade Federacije BiH za 2016. godinu.

Program rada razmatrala su nadležna radna tijela i dostavila svoje izvještaje.

U raspravi su učestvovali: Slaviša Šućur, Jasenko Tufekčić, Aner Žuljević, Mustafa Kurtović, Osman Ćatić, Sanel Mušović, Draženka Subašić i Admir Hadžipašić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 31 glasom za, devet uzdržanih i jednim glasom protiv, usvojio Program rada Vlade Federacije za 2016. godinu.

#### **15. Izvještaji o zaduženju Federacije Bosne i Hercegovine po osnovu emisije trezorskih zapisa na dan: 15.9.2015. godine, 22.9.2015. godine, 13.10.2015. godine, 10.11.2015. godine i 15.12.2015. godine,**

Izvještaje o zaduženju dostavila je Vlada Federacije BiH radi informisanja.

Izvještaje su razmatrala nadležna radna tijela i dostavila svoje izvještaje.

Predsjedavajuća je konstatovala da je Dom naroda Parlamenta FBiH primio k znanju izvještaje o zaduženju Federacije Bosne i Hercegovine po osnovu emisije trezorskih zapisa na dan: 15.9.2015. godine, 22.9.2015. godine, 13.10.2015. godine, 10.11.2015. godine i 15.12.2015. godine.

#### **16. Izvještaji o zaduženju Federacije Bosne i Hercegovine po osnovu emisije obveznica na dan: 20.10.2015. godine, 26.11.2015. godine, 8.12.2015. godine i 17.12.2015. godine**

Izveštaje o zaduženju dostavila je Vlada Federacije BiH radi informisanja.

Izveštaje su razmatrala nadležna radna tijela i dostavila svoje izveštaje. Predsjedavajuća je konstatovala da je Dom naroda Parlamenta FBiH primio k znanju izveštaje o zaduženju Federacije Bosne i Hercegovine po osnovu emisije obveznica na dan: 20.10.2015. godine, 26.11. 2015. godine, 8.12. 2015. godine i 17.12. 2015. godine.

### **17. Prijedlog za rješenje spornih pitanja u Prijedlogu Zakona o izmjeni i dopuni Zakona o eksproprijaciji**

Predsjedavajuća je podsjetila delegate da je Dom naroda Parlamenta Federacije Bosne i Hercegovine na 3. Sjednici, 8.10.2015. godine, usvojio Prijedlog zakona o izmjeni i dopuni Zakona o eksproprijaciji sa dva amandmana koja je Vlada Federacije prihvatila na sjednici Doma naroda, pa su postali sastavni dio Prijedloga zakona.

Amandmani glase:

#### **Amandman I.**

U Prijedlogu zakona o izmjeni i dopuni Zakona o eksproprijaciji dodaje se novi član 1. koji glasi:

„Član 1.

„U Zakonu o eksproprijaciji („Službene novine Federacije BiH“, br. 70/07, 36/10 i 25/12) u članu 3. iza riječi: „saobraćajne infrastrukture,“, dodaju se riječi: „poslovnih i industrijskih zona,“.

Postojeći čl. 1., 2., 3. i 4. Prijedloga zakona postaju čl. 2., 3., 4. i 5. Prijedloga zakona.

#### **Amandman II.**

Član 3. Prijedloga zakona o izmjeni i dopuni Zakona o eksproprijaciji mijenja se i glasi:

„U članu 45. st. (4) i (5) mijenjaju se i glase:

(4) Izuzetno od stava (2) ovoga člana za bespravno izgrađene stambene objekte za koje nadležni organ nije donio pravosnažno rješenje o uklanjanju, a koji predstavljaju jedinu stambenu jedinicu graditelja i članova njegove uže porodice (supružnici i djeca), graditelju odnosno njegovom pravnom sljedniku pripada pravo na naknadu u visini građevne vrijednosti toga objekta.



(5) Pravo na naknadu iz stava (4) ovoga člana pripada samo u slučaju da je bespravno izgrađeni stambeni objekat evidentiran na službenom orto-foto snimku teritorije Federacije Bosne i Hercegovine u razmjeri 1:5000 koji je uradila Federalna uprava za geodetske i imovinsko pravne poslove.“.

Predstavnički dom Parlamenta Federacije Bosne i Hercegovine na 10. vanrednoj sjednici, 23.10. 2015. godine, usvojio je Prijedlog zakona o izmjeni i dopuni Zakona o eksproprijaciji sa Amandmanom II. kojeg je Vlada Federacije prihvatila na sjednici Doma naroda, pa je postao sastavni dio Prijedloga zakona. Predstavnički dom je izglasao i sljedeći

**Amandman:**

“U Prijedlogu zakona o izmjeni i dopuni Zakona o eksproprijaciji briše se tekst člana 1. koji je Amandmanom I. Doma naroda, a kojeg je Vlada Federacije Bosne i Hercegovine prihvatila kao svoj, postao sastavni dio teksta Zakona.”

Dom naroda Parlamenta Federacije Bosne i Hercegovine na 6. sjednici, 26. 11. 2015. godine, nije usvojio Amandman koji je izglasao Predstavnički dom, a koji se odnosi na brisanje Amandmana I. kojeg je Vlada Federacije prihvatila na sjednici Doma naroda, pa je Prijedlog zakona o izmjeni i dopuni Zakona o eksproprijaciji dostavljen Zajedničkoj komisiji za usaglašavanje različito usvojenih tekstova zakona u domovima Parlamenta Federacije Bosne i Hercegovine.

Na sjednici održanoj 25. 2. 2016. godine, Zajednička komisija je utvrdila Prijedlog za rješenje spornog pitanja kojim predlaže domovima Parlamenta Federacije Bosne i Hercegovine da usvoje Prijedlog zakona o izmjeni i dopuni Zakona o eksproprijaciji u tekstu kako ga je usvojio Dom naroda Parlamenta Federacije Bosne i Hercegovine.

U raspravi je učestvovao Predrag Kojović.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 31 glasom za, deset uzdržanih i tri glasa protiv, usvojio Prijedlog za rješenje spornih pitanja u Prijedlogu zakona o izmjeni i dopuni Zakona o eksproprijaciji.

Sjednica je završena u 15 sati i 10 minuta.

Transkript sjednice čini sastavni dio Zapisnika.

SEKRETAR

PREDSJEDAVALA

Izmir Hadživdić

Lidija Bradara